



8

134











DE REQUISITIS,
ET NON REQUISITIS

AD LUCRANDAS

INDULGENTIAS

DISSERTATIO

ANDREÆ HIERONYMI
ANDREUCCI

E SOC. JESU



*Ad usum Congregationis Sacerdotum
in Domo Professa Romana
ejusdem Societatis.*



ROMÆ, Typis de Rubeis. MDCCLIX. +

SUPERIORUM PERMISSU.



Illmo, ac Rmo Dño Dño

ANTONIO EUGENIO
VICECOMITI

Sacræ Indulgentiarum Con-
gregationi a Secretis.

AUTHOR F.



*Vo potissimum
sunt, quæ Scri-
ptores librorum
adigere consue-
vere, ut ii spectatissimum Vi-
rum seligant, cui lucubratio-
nes*

nes suas obsequentissimi nuncupent. Alterum est, Amor Patrocinii obtinendi: Alterum est, Studium Observantiae significandæ. Ambo hæc me adduxere, ut Opellam banc qualemcumque Tibi, Illustrissime, ac Reverendissime Præsul, inscriberem. Amabam quippe Virum præsto esse, qui illam in se reciperet, eamque tueretur Nobilitate sua, & Pietate. Illicò pro ea, qua es in me benignitate; Ipse mihi occurristi, in quo si spectetur Nobilitas; ex ea Gente originem trahis, quæ Mediolanensium olim rerum potita latè per Insubriam dominabatur, quæque Supre-
mum

num edidit Romanæ Ecclesiæ
Moderatorem B. Gregorium
hujus nominis Decimum P. O.
M. *, totque illustres ex ea
prodiere Viri domi, militiæ-
que clarissimi, ut eam Gen-
tem nominasse, cumulatiſſimè
laudasse sit. Si verò spectetur
Pietas, is es qui abſo-
lutissima a majoribus cura
inſtitutus innocentia vitæ,
morum ac religionis laude
apud probatiſſimos quoſque
commendaris, qui omnibus
obvius & expositus, plenus-
que humanitate, nihil anti-
quius habes, quam iis ani-
mum disciplinis, inſtitutis-
que ut imbuas, quæ Ecclesia-

A 3

(ii-

* Ex Spondano in Auſtario ad an. 1271.

*Stico Viro, & Sedis Aposto-
licæ Administro plurimum
venerationis acquirunt. Op-
tabam præterea publicum ob-
servantiæ in Te meæ testi-
monium dare, sed expectabam
temporis opportunitatem: Hæc
nuperis diebus sese obtulit,
cum sacris ipse Ordinibus ini-
tiatus oblationes ex veteri
consuetudine Tibi vendicas,
omnesque confidimus nihil esse
propius, quàm publicis gra-
vioribusque rebus ut admo-
vearis. Visum propterea est
Dissertatiunculam hanc Tibi
dicare, muneri Tuo quo di-
ligentissimè fungeris accomo-
datam. De Indulgentiis nem-
pe ea est, quarum Congrega-
tio-*

*tioni jamdiu es a Secretis .
Hanc reipsa Tibi dono , do ,
ac dico . Illud unum superest ;
ut gratum id Tibi acceptum-
que sit , cæteris . verò ne con-
temnenda videatur , ipse pro
ea qua es autoritate efficies ;
norunt quippe universi id mi-
nimè contemnendum esse quod
sapientissimus ac peritissimus
rerum æstimator minime con-
temnendum esse judicaverit .
Vale .*



AD

LECTOREM.



Iraberis fortasse, quòd ipse intempestivè, ut cuiquam videri possit, Dissertationem hanc de Indulgentiis typis edam. Verùm scito, voluisse me optimo Præfuli, cui omni officiorum genere sum devinctus, publicum hoc observantiæ meæ testimonium præbere, & sacrae ille Indulgentiarum Congregationi cum sit a Secretis hanc de Indulgentiis tractationem non ingratam illi futuram existimavi, Addas quamplura
me

me hisce temporibus legisse, quæ Indulgentiarum vim vel extenuant, vel tot tantisque difficultatibus eas afficiunt, ut ab iis lucrandis fidelium animos spe prorsus destitutos amoveant. Quare facturum me operæ pretium censui si in hac mea senectute huic malo pro viribus occurrerem, atque ex probatis receptisque Doctoribus tutum, ni fallar, ac planum iter ad eas lucrandas Fidelibus ostenderem. Huc etiam illud accedit nolle me, qui rebus moralibus Canonicisque publicè enodandis olim addictus, nuper rudem acceperim, nolle me, inquam, otiose vivere, sed quidquid superest Virium id totum in aliorum utilitatem, Deo dante, conferre. Hæc omnia si diligenter expendis, mi Lector, nihil erit causa, ut mireris, quinimò consili-

lium hoc meum æqui bonique fa-
cies, & si qua in re Tibi forte
displicuero, id virium imbecil-
litati, non voluntati, pro tua
benignitate adscribes. Vale..



LAU-

LAURENTIUS RICCI

Præpositus Generalis Soc. JESU.

CUM Opusculum cui titulus : *De Re-*
quisitis, & non Requisitis ad lucran-
das Indulgentias : a P. Andrea Hierony-
mo Andreucci Societatis Jesu conscri-
ptum ; aliquot Nostri ejusdem Societa-
tis Theologi recognoverint , & in lucem
edi posse probaverint , potestatem faci-
mus , ut typis mandetur , si iis , ad quos
pertinet ita videbitur : Cujus rei gratia
has literas manu nostra subscriptas , &
Sigillo Officii nostri munitas dedimus .
Romæ die 2. Julii 1759.

Laurentius Ricci .

IMPRIMATUR,

Si videbitur Reverendiss. P. Mag. Sac. Pal.
Apost.

F. M. De Rubeis Patr. Const. Vicesg.

Dissertationem Theologicam *de Re-*
quisitis & non Requisitis ad lucran-
das Indulgentias, mandatis obsequens
Reverendissimi Patris Sac. Palat. Apo-
stolici Magistri legi, & examinavi: hanc
legere, & approbare idem est; nihil enim
in ea non conforme sanæ doctrinæ, &
probis moribus reperi, ac proinde di-
gnam, quæ publicis cudatur formis; Ita
censeo ex Collegio S. Mariæ de Victoria
Urbis hac die 12. Julii 1759.

F. Aloysius Maria a Jesu Carm. Exc.
S. Congregat. Indulgent. Consul-
tor & S. R. Univer. Inquisit. Qua-
lificator.

IMPRIMATUR.

Fr. Vincentius Elena Reverendiss. P. M.
Sac. Palatii Apost. Socius, Ord. Præd.

DE



DE REQUISITIS , ET NON RE-
QUISITIS AD LUCRANDAS
INDULGENTIAS

DISSERTATIO THEOLOGICA

§. I.

*Praemittuntur quaedam
prænotanda .*

Praenotandum est pri-
mò : Nomine Indul-
gentiæ , quæ concedi-
tur tempore Jubilæi , & aliis
temporibus, ex communi usu,
& acceptione Ecclesiæ, non si-
gnificari quamcumque remissio-
nem, aut relaxationem Peccato-
rum ; sed relaxationem dumtaxat

xat poenæ temporalis , debitæ peccatis dimissis per modum *absolutionis* , habentis annexam *solutionem* de thesauro Ecclesiæ , ut docet Bellar. cap. 5. undè sic describitur : *Indulgentia est remissio poenæ temporalis pro actualibus peccatis debitæ , extra Sacramentum facta ex Thesauri Ecclesiastici dispensatione.* Ità desumitur ex Extravaganti *Unigenitus* Clementis VI. , & ex communi Theologorum sententia post S. Thomam , & S. Bonaventuram eximios Ecclesiæ Doctores.

Prænotandum est secundò : Talium Indulgentiarum , quas nuper descripsimus Originem , juxtà Bellarminum Lib. 1. cap. 3. non reperiri , nisi ad Evangelium , vel Apostolos ascendamus , id quod est ex iis signis , ex quibus internoscuntur Catholica Dogmata ab Hæresibus . Probat
tur

tur, quia ut inquit citatus Venerabilis Cardinalis: *Nullus hactenus indicare potuit Authorem Indulgentiarum, neque locum, vel tempus, quo prædicari cæperunt: omnes enim, qui de Indulgentiis mentionem faciunt, loquuntur ut de re usitata, & recepta. Quare Martinus Kemniti-
us in 4. p. Exam. pag. 329. fatetur, Originem Indulgentiarum non satis luculenter in historiis notatam fuisse &c. hactenus Bel-
larminus.*

Prænotandum est tertio: Catholicos omnes debere secundum fidem confiteri, & asserere circa Indulgentias has tres veritates; (*juxta Cardinalem Toletum in Summa lib. 6. cap. 21.:*) Prima est, esse Thesaurum infinitum coalescentem ex satisfactionibus Christi, & Sanctorum in Ecclesia. Ità enim determinatur in
ci-

citata Extravaganti *Unigenitus* à Clemente VI. Secunda est, esse in Ecclesia Potestatem dispensandi Membris hunc Thesaurum; ita determinatur à Concilio Trident. sess. 25. Tertia est, esse utiles Indulgentias, & prodesse Fidelibus, qui convenienter eis utuntur. Ità determinatur in Concilio Lateranen., Viennen., Tridentin., ut notat citatus Toletus cit. lib.6. Summæ cap. 21. en ipsissima Cardinalis Toleti verba: *Unde catholicus debet secundum fidem confiteri, & asserere has tres veritates: Prima est esse hunc Thesaurum infinitum satisfactionum Christi, & Sanctorum in Ecclesia. Ita determinatur in Extravaganti Unig. à Clem.VI. Secunda est; esse hanc potestatem in Ecclesia dispensandi Membris hunc Thesaurum. Hæc determinatur à Concilio Tridentino sess. 25. Tertia*

ia est, esse utiles Indulgentias, & prodesse Fidelibus, qui convenienter eis utuntur. Ita determinatur in Concilio Lateranensi, Viennensi &c.

Prænotandum est 4. quamvis plures diversis temporibus circa Indulgentias subnascentes errores, seu falsas doctrinas Ecclesia represserit, ac respectivè damnaverit, tam in Luthero, quam in Bajo, qui aiebat: *Per passionem Sanctorum in Indulgentiis communicatas, non propriè redimuntur nostra delicta, sed per Communionem Charitatis nobis eorum passionem impertiuntur ut digni simus, qui pretio Sanguinis Christi à pœnis pro peccatis debitæ liberemur.* Ita proposit. 60. quamvis inquam id factum sit, non desunt tamen ex Neotericis, qui nonnullas contra Indulgentias Propositiones ediderint, quas
ne-

nemo ut arbitror admiserit. Tales videntur esse sequentes, videlicet: *Indulgentiæ tantum præcisè profunt, quantum tu ex tua parte confers, & nihil plus valent, quam tuus labor, & tuus conatus sufficit iudicio Dei.* Ita in terminis Joannes Bauduin. in Libello cui tit. Jugement &c. pag. 106. : *Qui post Baptismum mortaliter deliquerunt, non possunt ne quidem via Indulgentiarum assequi plenam remissionem penæ temporalis, quæ dimissa culpa luenda superest, nisi ipsis Indulgentiis adiunxerint ex parte sua magnos fletus, magnosque labores.* Ita cit. Auctor in eodem Libello pag. 105.

His prænotatis quædam de Requisitis, & non Requisitis ad lucrandas Indulgentias expendam, & sane quod attinet ad requisita paucis rem conficiam. Constat quip-

quippe inter Catholicos Doctores, quod, supposita in Subiecto capacitate remota consistente in his tribus: scilicet, ut sit Homo ratione utens, Baptizatus, & aliquo modo subditus; supposita, inquam, hac capacitate, requiritur in Subiecto dispositio proxima, quæ alia est Habitualis, alia Actualis. Prior, ut docet Suarez disp. 52. de Indul. sect. 2. est habitus Gratiæ, vel Fidei; Nam, ut ipse ibidem ait, necessarius est status Fidei, per quam sit Homo conjunctus Ecclesiæ, tanquam membrum ejus, quia (sunt ejus verba) *Indulgentiarum participatio pertinet ad communionem Sanctorum, quas non participant, nisi qui sunt membra Ecclesiæ: Membrum enim non participat influxum, & Communionem aliorum membrorum, nisi debito modo corpori con-*

conjunctum sit : Prima autem unio membrorum Ecclesiæ sit per fidem : ergo hæc est quasi prima fundamentalis dispositio ad lucrandum effectum indulgentiæ . Hactenus Suarez , qui deinde supposita hac interna Fidei unionem , & externæ Communicationis , docet statum Gratiæ esse dispositionem cum Fide omninò necessariam ad proprium fructum , seu effectum indulgentiæ consequendum ; qui est remissio temporalis poenæ . Posterior dispositio *proxima* , dicitur *Actualis* , & est *Exequutio operis injuncti* . Cum igitur de his constet , neutiquam in his immorabor , sed de uno duntaxat , vel altero , & ad summum tertio , quæ licet utilia , non videntur tamen necessariò requisita : paucis differam .

* * *

§. II.

§. II.

Status, & Resolutio Quaestionis.

QUæritur utrum ad lucrandas Indulgentias præter statum gratiæ, & executionem operum, quæ injunguntur requiratur Actus Charitatis perfectæ, & quidem eo major, seu magis intensus, quò major, & plenior fuerit Indulgentia?

R. Non defuisse ex Recentioribus, qui sub quodam verborum involucro id affirmarint. Hinc memini me olim legisse apud quosdam Neotericos, in lucrandis Indulgentiis, fructum acquiri non tam pro executione operis injuncti, quam pro mensura Charitatis, qua illud fieri quis imperat. Ratio his videtur esse, quia *Deus non remunerat, nisi Charitatem; quoniam charitas so-*

sola Deum honorat, ut ipsi falsò contendunt juxta Propositi. 66. ex proscriptis a Clem. XI. siquidem Deus remunerat etiam actus Fidei, Spei, Misericordiæ, Justitiæ, Poenitiæ, & similes, & ab iisdem etiam honoratur. Hinc apparet, eos ad Indulgentiæ fructum requirere actum Charitatis, seu opus elicitum ex motivo, & impulsu Charitatis. Id, quod implicitè aliquando, & sub ambagibus insinuant; sunt enim Nonnulli, qui, ut aiebat S. Bernard. serm. 55. in Cantica: *Nocere, quam vincere malunt, & ne apparere quidem volunt, sed serpere.*

Verum non negaverim utile, ac Pium esse, ut suscepturus Indulgentias præter statum gratiæ, & executionem operis injuncti, ulterius se disponat per actus elicitos perfectæ charitatis, & quidem

dem eò major erit utilitas in ordine ad finem supernaturalem, quò magis intensi fuerint ejusmodi actus. At censeo ad lucrandas Indulgentias, quæ à Summis Pontificibus, aliisque conceduntur, supposito statu gratiæ, & supposita executione operum, quæ hic & nunc injunguntur, non requiri ex necessitate, ut illas suscepturus eliciat actus charitatis perfectæ, eò magis intensos, quò maior, & plenior fuerit Indulgentia.

Probo hoc primò: Nam ad lucrandas Indulgentias nulla alia dispositio *simpliciter*, & ex *natura* rei prærequiritur ex parte subjecti, nisi *status gratiæ*, quamvis *ex voluntate concedentis* prærequiratur aliquando, nempe, quando id in concessione exprimitur, etiam executio alicujus pii operis: quod non inficior
po-

potest esse *Actus Charitatis*, ut communiter docent Theologici cum Suarez de Indulg. disp. 52. sect. 4. Cum autem in concessione Indulgentiarum plerumque non exprimaturs actus perfectæ charitatis eò magis intensus, quò major, ac plenior fuerit Indulgentia; sequitur talem actum, supposito statu Gratia, neque simpliciter, & ex natura rei, neque ex voluntate concedentis, plerumque prærequiri in subjecto.

Deindè ut propius ad rem accedam, sic ajo: vel sermo est de Indulgentia plenaria in sensu improprio, idest, *de remissione culpæ, ac pœnæ æternæ*, simul & *temporalis*: vel sermo est de Indulgentia plenaria in stricta, & propria acceptione Ecclesiæ, idest, de remissione pœnæ dumtaxat temporalis, debitæ peccatis actualibus jam dimissis per ab-
so-

cato mortali, id autem sapit Propositionem num. 70. damnatam in Bajo, ubi sic: *Homo existens in peccato mortali, potest habere veram Charitatem*: Itèm non est necesse hoc alterum, nempe, quod Charitas eò sit intensior, quò plenior est Indulgentia; Nam quælibet perfecta contritio, quælibet perfecta Charitas, dummodò verè talis sit, remittit culpam, & poenam æternam, etiam si ea non fuerit intensa proportionaliter ad gravitatem culpæ, unde agebat S. Th. in 4. dist. 17. q. 2. art. 5., quæstiunc. 3.: *Dicendum, quod quantumcumque sit parvus dolor, dummodò ad Contritionis rationem sufficiat, omnem culpam delet*: Illud dumtaxat verum est, quod ad remissionem non solum culpæ, & poenæ æternæ, sed etiam ad remissionem totius culpæ temporalis

ex opere operantis, & non ex *vi* solutionis liberalis factæ de thesauro Ecclesiæ, necesse est, ut charitas, seu perfecta contritio habeat proportionalem intensiorem; unde agebat Angelicus 3. p. qu. 36. art. 5. ad 1. sic: *Quandoque tanta commotione*, (Deus) *convertit cor hominis, ut subito perfectè consequatur sanitatem spirituales, non solum remissa culpa, sed sublati omnibus peccati reliquiis, ut patet de Magdalena Luc. 3.*: At hæc intensiorem necessitas datur, quando remissio totius Poenæ temporalis habenda est, ut dicebam, ex opere operantis, non autem quando habenda est ex *vi* liberalis solutionis de Thesauris Ecclesiæ, unde proseguendo distinctionem supra factam, insisto.

Si dicatur secundum, idest, si sermo fuerit de Indulgentia

in stricta , & propria acceptione Ecclesiæ , verum quidem est prærequiri ad eam lucrandam statum Gratiæ , & Charitatem habitua-lem , nàm alienum est à divina Providentia , & prudenti Gubernatione , remitti Reatum poenæ perseverante culpa , uti docet S. Thomas in addit. 3. partis quæstion. 27. art. 1. , at falsum est , quod prærequiratur per se , & ex natura rei Charitas actualis magis , aut minus intensa , quò major , vel minor fuerit Indulgentia . Ratio est , quia juxtà communem Theologorum doctrinam supposita potestate in concedente , Proportione Causæ , & statu Gratiæ in Subiecto nil aliud *per se* requiritur ad lucrandas Indulgentias , & solum per accidens *ex voluntate concedentis* requiritur Executio Operum , quæ ille per modum condi-

di-

ditionis hic & nunc exigit: At-
 qui non semper ab eo exigitur
 per modum conditionis Actus
 Charitatis magis vel minus in-
 tensus, quò major, vel minor
 concedatur Indulgentia; Ergo
 actus Charitatis &c. non est ne-
 que per se, neque ex voluntate
 concedentis semper necessarius
 ad lucrandas Indulgentias.

Ubi sistas tantisper Lector,
 & notes ab Neotericis nonnullis
 Authoribus. 1. Confundi, & per-
 peram accipi hoc vocabulum *In-
 dulgentia*; passim enim illud
 usurpant pro Remissione culpæ,
 & poenæ æternæ, unde promif-
 cuè loquuntur de Indulgentia
 collata à Christo Magdalenæ, ac
 de Indulgentia, quæ confertur
 Fidelibus ab Ecclesia, cum cæ-
 teroquin constet apud Bellarmi-
 num lib. 1. de Indulg. cap. 7.
 per eiusmodi Ecclesiasticas In-
 dul-

dulgentias Fideles nec absolvi ,
 nec solvi à Reatu culpæ ullius ,
 sive læthalis , sive venialis . II.
 Aliquando illud usurpari pro re-
 missione illarum poenarum quas
 vetus Ecclesiæ disciplina iniun-
 gere consueverat non ad satisfac-
 iendum Deo , sed ad aliorum
 exemplum , & coercionem ,
 unde derivari crediderim , quod
 ipsi aiunt nempè Indulgentias
 non prodesse iis , qui non com-
 miserunt peccata publica , siqui-
 dem ii subiecti non erant poenis
 canonicis . Hæc tamèn doctrina,
 quod Indulgentia consistat in
 Relaxatione talium poenarum ,
 (idest in absolutione ab obliga-
 tione poenarum , quas Canones
 statuere) improbatur communiter
 à Theologis cum S. Thoma , qui
 in Supplem. q. 25. art. 1. ait :
Hæc opinio non videtur vera : imò
 post S. Thom. ibidem addit Bel-
 lar-

Iarminus loc. cit. in tali acceptio-
 ne, *non esset utilis, sed noxia*.
Indulgentia, & Ecclesia Filios
suos in re maximè gravi decipere
videretur, liberaret enim eos à
pœna huius vitæ mitissima, &
remitteret ad pœnam atrocissi-
mam Purgatorii: Tandem notes
 ex mala, seu non recta acceptio-
 ne huius vocabuli *Indulgentia*
 derivari, quod Authores non-
 nulli ad lucrandam Indulgen-
 tiam, jam prærequirant Actum
 Charitatis perfectæ, & quidem
 magis, vel minus intensum,
 prout maior, vel minor fuerit
 Indulgentia; jam prærequirant
magnos fletus, & labores, ita
scilicet exigente Divina Justitia,
ut illi integrè, ac plenariè satis-
ficiamus, ut scilicet infinuetur
 de præcepto naturali ac divîno
 esse, quod in hac vita jugi exte-
 rius satisfactioni exhibendæ infi-

stamus: Hoc autem præceptum naturale, ac divinum Theologi passim negant post remissionem culpæ, prout videre est apud S. Thom. in 3. partem disp. 34. art. 8. & 9., & apud Suarez de Poen. disp. 15. sect. 7. jam etiam doceant ab Ecclesia non censi oportunitate explicare quid sit, & in quo consistat *Utilitas Indulgentiarum*, nec ejusmodi notitiam à Fidelibus curiosè inquirendam, sed simpliciter credendum Indulgentias *utiles*, ac salubres esse: quod videtur idcirco doceri, quia utilitas remissionis poenarum, per solutionem de thesauro Ecclesiæ, ab his Authoribus vel non agnoscitur, vel ab aliis ut agnoscatur ipsi nolint. Propterea illud menti continuò occurrat, sermonem hunc esse de Indulgentia in propria, & formali Ecclesiæ significatione accepte-

cepta, idest, *de Relaxatione*
pœnæ temporalis, pro actualibus
peccatis jam dimissis debita, ex-
trâ Sacramentum facta, ex the-
sauri Ecclesiastici dispensatione:
 prout habet Bellarminus.

Dices ut Adversariis suppetias
 feras. 1. si ve Indulgentia acci-
 piatur pro relaxatione peccato-
 rum *quoad culpam*, si ve pro Re-
 laxatione peccatorum *quoad pœ-*
nam, semper stat, quod eò ma-
 jor Indulgentia acquiratur, quò
 maior fuerit in Subiecto Chari-
 tas; nam Lucæ 7. dicitur de
 Magdalena indistinctè de Re-
 missione culpæ, ac Remissione
 pœnæ: *Remittuntur ei peccata*
multa, quoniam dilexit multum:
 ergo quò maior fuerit Charitas,
 eò maior acquiratur Indulgentia,
 si vè ea fuerit Remissio culpæ, si-
 ve fuerit Remissio pœnæ.

R. Indulgentiam datam a

Christo Domino Magdalenæ fuisse quoad culpam, & poenam *ex opere operantis*, seu ex perfecta illius contritione, quæ licet ad effectum justificandi non petat perfectionem ex certo intensiōis gradu, sed ex Charitate, quæ Deus propter se diligitur; tamen ad effectum tollendi omnes poenas temporales, & reliquias peccatorum, exigit gradum quemdam intensiōis, ut suprà vidimus doceri à S. Thoma 3. p. qu. 86. art. 5. ad 1.; nobis autem hic sermo est de Indulgentiâ quoad poenam *ex thesauri Ecclesiastici dispensatione* facta per Prælatos Ecclesiæ, qui non exigunt regulariter, supposito statu gratiæ in Subiecto, aut actum Charitatis, aut ejus intensiōem tanquam conditionem pro majori, vel minore dispensanda Indulgentiâ; unde non valet illatio
ab

ab Indulgentia Magdalenæ data à Christo Domino ad eam, quæ conceditur per Prælatos Ecclesiæ.

Dices. 2. Qui peragit opera, injuncta a Prælati Ecclesiæ perfectiori modo, acquirit majorem, vel minorem Indulgentiam, prout magis, vel minus perfectus fuerit ille modus, sed sic est, quod qui peragit opera injuncta ex motivo charitatis, is peragit ea opera perfectiori modo, & quidem eò magis perfecto, quò fuerit intensior charitas; ergo qui elicit magis vel minus intensum actum Charitatis, acquirit majorem, vel minorem Indulgentiam.

R. Qui in statu Gratiæ peragit opera injuncta perfectiori modo, utique sibi acquirit majus meritum *ex opere operantis*; at *ex dispensatione thesauri Ecclesiastici*, non acquirit majorem Indulgentiam, seu majorem re-

laxationem poenæ temporalis ;
 nam Prælati Ecclesiastici cum ex
 thesauro Ecclesiæ dispensant id
 non peragunt juxtà leges distri-
 butivæ Justitiæ, sed juxta leges li-
 beralis cujusdam donationis pru-
 denter factæ . *Ex Suarez de In-
 dulg. disp. 52: sect. 8.* Hinc ajec-
 bat S. Thomas apud eundem
 Suarez : *Quod ille , qui (ad
 visitandam Ecclesiam) est vici-
 nus Ecclesiæ , & etiam Sacerdo-
 tes & Clerici , consequuntur tan-
 tam Indulgentiam sicut illi , qui
 venirent a mille Dietis , quia re-
 missio non proportionatur labori ,
 sed meritis , quæ dispensantur :*
 Consequenter &c.

Alterum nunc quæri potest ;
 an scilicet præter gratiam , &
 opus injunctum requiratur ex
 parte Recipientis Indulgentiam
 Propositum, seu Sollicitudo quæ-
 dam ad satisfaciendum per pro-
 pria

pria Opera pro peccatis suis?

R. Utile quidem esse & opportunum, ad incrementum meriti existenti in statu Gratiæ, ut habeat quando suscepturus est Indulgentiam, propositum satisfaciendi quoad fieri poterit *de propriis laboribus*, & re ipsa det operam ut satisfaciat; non tamen id est absolute necessarium ad lucrandas Indulgentias, nam licet hoc olim docuerint post Cajetanum, Fumus, Navarrus, alique perpauci, (quamvis enim Eusebius Amort p. 2. sect. 4. §. 189. citet 70. fermè Auctores stantes pro Sententia Cajetani, si tamen diligentius eos legeris, immane quantum hic numerus decrescet), licet inquam id nonnulli docuerint probabilius nihilominus est quod docet Bellarminus lib. 1. cap. 13. de Indulgentiis, id non esse necessarium ad lucrandas Indul-

dulgentias, cum id non sit *ex operibus* inunctis, nec aliundè ejus necessitas probetur, id quod confirmatur ex auctoritate Angelici Doctoris Quodlib. 2. art. ult. ibi: *Dicitur omnibus verè Pœnitentibus, non dicitur & satisfacientibus*, quia Indulgentia non excusat à Contritione, & Confessione, sed cedit in locum satisfactionis. Post S. Thomam hanc conditionem reiciunt cæteri fermè omnes Doctores tum Theologi, tum Canonistæ, ut videre est apud Suarez disp. 52. sect. 11. à num. 2. & apud Caldarinum in Cap. *Nostro postulasti de Pœnit. & Remiss.* neque obinde censenda est Ecclesia nostram fovere negligentiam, sed juvat Ecclesia Fidelium fragilitatem, quod si ipsi inde sumant occasionem remissius agendi, id est accidentarium incomodum, cui aliis

aliis mediis occurrendum, & obviandum est. Nec refert, quod juxta *L. Bona Fides* ff. de deposito: Indignus sit aliena ope, qui sibi non vult opitulari cum possit: Etenim ad hoc juris pronunciatum dicimus multa etiam indignis *negative*, idest non dignis conferri beneficia, si fuerint indigentes. Quare &c. inò ait citatus Bellarminus loc. cit. se non videre quemadmodum Romani Pontifices non deciperent Populos, si indulgentiam ea conditione proponere vellent, quam nunquam explicarent. Accedit quod in verè Poenitentibus ut talibus, quibus Indulgentiæ concedi solent, requiritur Propositum satisfaciendi *non absolute, sed conditionate*; videlicet, *nisi aliundè ipsis satisfiat*. Ut docet ibidem Bellarminus; cum autem Ecclesia de thesauro inhe-

xau-

hausto coalescente ex satisfactionibus Christi, & Sanctorum pro eis Deo satisfaciat, erogando, seu exhibendo Deo illas satisfactiones pro poenis temporalibus eis debitis sequitur quod verè sint Poenitentes, etiamsi non habeant propositum satisfaciendi de laboribus, ac poenalitibus propriis, *dummodò tamen habeant propositum exequendi Poenitentias iniunctas à Confessario*, quarum executio necessaria videtur etiam suscepturo indulgentias, tum ob integritatem Sacramenti, tum alias ob causas.

Postremò quæri potest tertio, an in Recipiente Indulgentias requirantur magni fletus, & labores, ut Recentiores nonnulli affirmare non dubitarunt.

R. Utiles, quidem esse etiam istos, sed nequaquam necessarios in Recipiente ad effectum Indulgent-

gentiarum; nam S. Thom. Quodlibet 2. art. ultimo. Ex parte Recipientis nihil aliud requirit, nisi statum gratiæ, & quod opus injunctum impleat. Et animadvertit in forma Indulgentiæ sæpè dici *Pœnitentibus, & Confessis*, nunquam vero dici: Et *satisfacientibus*, intelligas, siue per *magnos fletus*, siue per *magnos labores*, quia Indulgentia conceditur loco satisfactionis.

Nihili vero faciendum est pronuntiatum illud, videlicet, *rigorem in satisfactione injungenda, vel suscipienda voluntariè, ac spontaneè per magnos fletus, ac labores, fuisse olim, atque adeò hætenus esse spiritum proprium Ecclesiæ*; Nam vel sermo est de spiritu Ecclesiæ, quo ipsa & antiquitus, & de præsentī docet, de consilio esse ob multiplicem utilitatem, ut suscipiantur à Fide-

delibus magni labores, & voluntariae corporis afflictationes, ad effectum satisfaciendi integrè Divinae Justitiae pro poenis temporalibus, quae restant luendae post dimissam culpam? Et sic *Verum* dicitur; vel sermo est de spiritu Ecclesiae, quo ipsa de facto exigat, & olim exegerit à Fidelibus magnos fletus, & magnos labores, tanquam *de praecepto*, ut vel illis absolutio in foro Sacramentali impertiretur, vel ab illis extra Sacramentum remissio culpae impetraretur? & sic falsum dicitur, ac legentibus imponitur; nam spiritus Ecclesiae tam veteris, quam novae, nullus alius fuit, atque est; quam in foro Sacramentali salutare, & convenientes satisfactiones injungere; extra verò forum Sacramentale voluntarias, ac sponte susceptas satisfactiones plurimi facere, eas

earque docere, non quidem esse in præcepto, sed tantum esse securiorem viam, & necessariam non simpliciter, sed ad perfectam animæ liberationem, seu puritatem, nisi aliundè de Thesauro Ecclesiæ provideatur. Unde spiritus Ecclesiæ non apparet esse spiritus rigoris, sed prudentiæ, & charitatis.

Demùm etiamsi admitteretur, quod non rarò, (ut vult Morinus) ab veteri Ecclesia graves, & multiplices satisfactiones exigerentur in foro Sacramentali, & extra illud non facile, nec frequenter quicquam dispensaretur de Thesauro Ecclesiæ; nihilominus illud obversari nobis debet, quod olim in suis Litteris Encyclicis tradebat de anno 1692. Illustrissimus Mechliniensis Archiepiscopus, videlicet : *Fideles omnes Ecclesiæ matris suæ consue-*

fuetudinem, & praxim teneant, longo sæculorum usu probatam, neque supra suam se magistram erigant, aut ejus Indulgentiam ausu temerario corripiant: hætenus citatus Archiepiscopus, benè, & compositè.

§. III.

*Illationes quædam
proponuntur.*

EX hætenus dictis inferes. I. non esse verum, quod nonnulli scripsere: *Indulgentias in tantum nobis prodesse, in quantum per Sanctorum Communionem ità nos Christi, & Sanctorum satisfactiones juvant, ut intuitu illarum, Dei misericordia, & infinita Bonitas nostri misereatur, ac pœnas, quas debemus relaxet: Ratio est, quia ejusmodi doctrina vel eadem est, vel certè af-*

affinitatem habet, cum ea Baji
 damnata Propositione num. 60.
 nimirum: *Per passiones Sanctorum
 in Indulgentiis communicatas ,
 non propriè redimuntur nostra
 delicta , sed per communionem
 Charitatis nobis eorum passiones
 impertiuntur , ut digni simus ,
 qui pretio Sanguinis Christi à
 pœnis pro peccatis debitis libere-
 mur.* Deindè hæc eadem doctri-
 na non videtur agnoscere nec
 Thesaurum in Ecclesia ex super-
 fluentibus Sanctorum satisfactio-
 nibus, nec Potestatem in Præla-
 tis Ecclesiæ ad eas satisfactiones
 dispensandas, nec utilitatem in
 modo dispensandi per absolutio-
 nem, & solutionem relatè ad vi-
 ventes ut expientur à pœnis tem-
 poralibus, & *per solutionem* dum-
 taxat relatè ad defunctos, prout
 communiter receptum est in Ec-
 clesia apud Theologos.

In-

Inferes secundo non esse de necessitate absoluta Indulgentiæ, ut exigatur aliquod pium opus ad effectum ejus obtinendum; itaut non possit Pontifex alio modo Indulgentiam concedere; nam licet non defuerint ex Eruditis, qui id affirmarint, ducti ex usu Ecclesiæ, nunquam enim vidimus, aut legimus, Pontifices alio modo concessisse Indulgentias: Nihilominus comuniter Theologi apud Suarez disput. 52. sect. 3. ajunt, non esse simpliciter, & absolutè de necessitate Indulgentiæ, ut concedatur sub conditione alicujus Operis faciendi ad effectum Indulgentiæ consequendum. Probant hoc ex generali Dogmate a Theologis recepto, tria esse necessaria, ac sufficere ad valorem, & fructum Indulgentiæ, scilicet Potestatem in Concedente, Gratiam in Recipien-

piante, & Pietatem, seu proportionem in Causa; sed hæc tria possunt perfectè concurrere absque novo opere, quod exigatur ab eo, cui Indulgentia conceditur: ergo &c.

Neque dicas, non dari in tali hypothese proportionem in Causa, etenim, ut bene notat Suarez, proportio sufficiens multiplex esse potest, siue ex gratitudine, siue ex charitate, ut quis: v. g. excitetur ad serviendum Deo ferventiùs &c.

Neque obstat, id nunquam a Pontificibus factum esse; nam a negatione actus non valet ad negationem potentiae. Vid. Card. De Lugo disp. 27. de Pæn. n. 86.

Reliquum proinde est, ut illud apud nos firmum ratumque sit, quod suprà jam diximus, videlicet, ad valorem & fructum Indulgentiae per se, & ex natura
Rei

Rei hæc dumtaxat requiri. 1. Potestatem in concedente, 2. Proportionem causæ, & 3. Statum Gratiæ in suscipiente: Per accidens verò & ex voluntate concedentis requiri ulterius executionem operum, quæ pro conditione fuerint ab eodem iniuncta. Hinc habes nunquam posse nos esse omninò certos de acquisitione Indulgentiæ, cum ex una parte acquisitio cuiuslibet Indulgentiæ pendeat è statu Gratiæ sanctificantis, ex altera verò parte nemo sciat, utrum *amore, an odio dignus sit*; Præterea in aliquibus Indulgentiis tot conditiones, ac *taliter* à concedentē requiruntur, ut licet possimus scire eas à nobis fuisse materialiter completas, ignoramus tamēn utrum formaliter completæ fuerint, & cum ea honestate, quam Deus, & eius Vicarius, vel aliū con-

concedens hic & nunc requirit. Ob quam rem ab eo, qui voluerit sibi in hac vita consulere, & poenas temporales sibi debitas integrè in vita expiare, Pœnitentia exterior nunquam est omninò excludenda. In quo convenimus cum Authoribus nonnullis Neotericis.

Dixi nunquam nos esse omninò certos certitudine, videlicet, infallibilitatis de acquisita Indulgentia, quandoquidem nunquam sine speciali revelatione, sumus ita certi de Statu Gratiæ, qui ad eam acquirendam est ex natura rei necessarius, at non propterea inde sequitur omittendum à nobis esse, Studium acquirendæ Indulgentiæ, etenim in primis tanta est ejus utilitas, ut spes ipsa de lucranda Indulgentia incitamento nobis esse debeat, ad dandam operam, ut eam lu-

C

cre-

cremur : deinde tales possunt concurrere circumstantiæ , tales possunt esse adhibitæ diligentia tum in procurando Statu Gratia , tum in exequendis Operibus iunctis , ut quamvis possibile aliàs sit , nos non consequutos esse Indulgentiam , tamen practicè loquendo , non nisi temerè possimus de Indulgentia consecutione timere aut suspicari , quoniam sola possibilitas de contrario , non est rationabile fundamentum ad timendum , aut suspicandum , uti observant Animastici ; ideoque potest fieri , ut simus certi moraliter de consecutione Indulgentia , ea videlicet certitudine , quæ sola dari potest in hac Providentia , quaque nos contenti esse debemus , ut ad Indulgentiam lucrandam incitemur .

Probè rem hanc intellexerat

San-

Sanctus Patriarcha Ignatius de Loyola, qui tanti faciebat studium lucrandi Indulgentias, ut in suo aureo Exercitiorum libello, à Sede Apostolica approbato, testatum reliquerit: Peccare non leviter illum, qui ubi Romanus Pontifex, vel alius Ecclesiasticus Prælatus, propositis Indulgentiis, ad ipsa quædam opera in communi necessitate Fideles cohortati fuerint, pias eas Rectorum Ecclesiæ cohortationes aspernari audeat, ac transgredi. Quæ quidem verba *aspernari, ac transgredi*, si conjunctim accipiantur, inquit Suarez de Relig. tom. 4. lib. 9. nullam habent difficultatem, patet siquidem non leve esse peccatum ex contemptu id totum negligere, etiamsi contemptus fuerit dumtaxat practicus, quia continet quandam veluti injuriam rerum sacrarum, & in-

dicat animum a spiritualibus valdè alienum . Si verò separatim consideretur illud verbum *transgredi* , adhuc assertio S. Patriarchæ subsistit, tum quia talis transgressio , seu neglectus lucranda ea occasione Indulgentias , est quasi prodigalitas quædam spiritualium bonorum , tum quia moraliter loquendo , si homo sciens , & volens , ac directâ voluntate id omittat , vix fiet sine aliqua culpa , tum quia homo est nimis negligens in subveniendo spiritualiter , communi bono , propter quod hic , & nunc tales gratiæ conceduntur , tum demum , quia moraliter loquendo vix fiet sine aliquo scandalo . Illud autem *non leviter* intelligi debet non de peccato mortali , sed de gravi, & non contemnendo veniali . Hactenus Suarez . Abigendus propterea est torpor om-

omnis; & negligentia circa acquirendas Indulgentias.

Hæc olim differebam coram Sacerdotum coetu, in Congregatione Casuum, quam dirigebam in Domo Professorum Romana, subjiciens universa ut par est, judicio, & correctioni S. R. E. cui addictissimum me volo, ac profiteor.

APPENDIX.

CUm fermè fiat, ut Fidelibus nonnulla suboriantur Dubia circa ea quæ sunt certò Requisita ad lucrandas Indulgentias, videlicet, An sufficiat Status Gratiæ ad fructum Indulgentiæ, quin requiratur Sacramentalis Confessio in eo qui non habet conscientiam peccati mortalis quando Indulgentia conceditur *omnibus verè Pœnitentibus*,

Et confessis &c. qui Ecclesiam visitaverint &c. in quibus discrepabant olim Theologi asserentibus aliis, aliis verò probabilius negantibus; nunc autem lis omnis dirempta est per Decretum novissimè editum à Sacra Indulgentiarum Congregatione; Placet propterea per extensum hoc exhibere. Ecce illud.

DECRETUM

Sacrae Congregationis Indulgentiis, & Sacris Reliquiis præpositæ.

UT Christifideles scire possint quid sibi tenendum sit pro acquirendis Indulgentiis in Sententiarum varietate super intelligentia verborum: *qui verè pœnitentes, Confessi, ac Sacra Communione refecti Ecclesiam*
vi-

visitaverint : quæ in Indulgentiarum Brevibus inferi solent , in Sacra Congregatione Indulgentiis Sacrisque Reliquiis Præposita discussis *die 31. Martii proximi præteriti* nonnullis dubiis , eadem Sacra Congregatio fuit in Voto , Confessionem Sacramentalem , quando in Brevibus apponitur pro Indulgentiarum consecutione , peragi omninò debere etiam ab iis , qui sibi læthalis peccati conscii non sunt ; nec non præfatam confessionem suffragari etiam posse , si expleatur in vigilia Festivitatis . Quod autem ad Ecclesiæ visitationem spectat , eam impleri posse , sive ante , sive post aliorum piorum Operum implementum .

Factique de iis per me inscriptum ejusdem Sacræ Congregationis Secretarium relatione SSmo Dño Nostro ; Sanctitas
Sua

Sua ejusdem Sacrae Congregationis Votum benignè approbavit ; illudque publicari mandavit , quibuscumque in contrarium facientibus non obstantibus.

Datum die 19. Maii 1759.

Fr. J. Card. Portocarrero
Præfectus .

Loco ✠ Sigilli .

A. E. Vicecomes Sac. Congreg.
Indulgentiarum Secretarius.

Solent etiam nonnulli dubitare , an Actus Charitatis sit aliquando opus injunctum pro lucranda Indulgentia , ideoque an sit aliquando dispositio actualis necessariò requisita ad Indulgentiam ?

R. Diligentia ac Religione
piissimi Secretarii factum esse ,
ut

ut ſæl. recordationis Benedictus XIV. Indulgentias quasdam conceſſerit iis Fidelibus, qui Actus Virtutum Theologalium Fidei, Spei, & Charitatis elicuerint, ac per conſequens Actus elicitus Charitatis eſt quandoque actualis diſpoſitio requiſita ad lucranda certam quamdam Indulgentiam. Do ipſum Sanctiſſimi Domini Benedicti XIV. Decretum.

INDULGENTIÆ

*Conceſſæ pie, devote, & ex corde
recitantibus Actus Virtutum
Theologicarum Fidei,
Spei, & Charitatis.*

A Nimadvertens SS. D. N. Benedictus PP. XIV., quam utiles, quinimò neceſſarii ſint ad æternam ſalutem Theologi-

gicarum virtutum Actus, Fidei
videlicet, Spei, & Charitatis,
ut omnes utriusque sexus Christi-
fideles ad illorum exercitium ex-
citaret, audito voto Sacræ Con-
gregationis Indulgentiis, Sa-
crisque Reliquiis præpositæ, In-
dulgencias pro iisdem Actibus a
san. mem. Benedicto XIII. die
15. Januarii anni 1728. conces-
sas, benignè confirmavit, Ple-
nariam nimirum cum facultate
eam Fidelium defunctorum Ani-
mabus applicandi, semel in
mense lucrandam ab iis, qui
quotidiè per mensem præfatos
Actus piè, devotè, & ex corde
peregerint, die nempe ab uno-
quoque eligenda, in qua verè
penitentes, Confessi, ac Sacra
Communione refectioni, pro Chri-
stianorum Principum concordia,
Hæresum extirpatione, ac San-
ctæ Matris Ecclesiæ exaltatione,
ut

ut decet, oraverint: nec non aliam similiter Plenariam in mortis articulo. Ut autem commissas sibi Oves ad frequentiore hujusmodi Actuum usum alliceret Sanctitas Sua, Indulgentiam septem annorum, totidemque quadragenarum, cum eadem applicationis facultate, quæ juxta ejusdem sui Prædecessoris concessionem, semel tantum in die consequi poterat, ad quamlibet antedictorum Actuum piam &c. ut supra recitationem, clementer extendit.

Declaravit insuper Sanctitas Sua, præfatas omnes Indulgentias addictas minimè esse certis, determinatisque verbis, proptereaquè unumquemque uti posse in recitatione dictorum Actuum qualibet formula, dummodo in ea singularum Virtutum Theologicarum specialia motiva exprimantur.

mantur : Datum die xxviii. Januarii Anno MDCCLVI.

Fr. J. Card. Portocarrero
Præfectus.

Loco ✠ Sigilli.

A. E. Vicecomes Sac. Congr.
Indulg. Secret.

FINIS.

APPENDIX ALTERA

*Ad Dissertationem banc de Requi-
sitis, & non Requisitis pro Lu-
crandis Indulgentiis. Ex Insti-
tutione 53. fel. rec. Benedicti
PP. XIV.*



Las inter, atque erudi-
tas Institutiones, quas
in Archiepiscopatu Bo-
noniensi olim a se ha-
bitas fel. rec. Benedictus PP. XIV.
latinè reddi, & typis mandari
voluit, ut omnibus nempe pro-
descent, quæ pro particulari Ec-
clesia fuerant conscripta; has in-
quam inter Institutiones ea quam
maximè ad rem nostram facit,
quæ extat in ordine editionis se-
cundæ num. 53., ubi sapientissi-
mus Pontifex postquam occasione
Junijs Jubilæi monuit Gregem
sibi commissum de statu gratiæ,
a &

& de executione operum , quæ
 injungebantur pro lucrando eo Ju-
 bilæo , hæc deinde universim ha-
 bet de Indulgentiis ibi , Hæc de
 „ injunctis operibus monenda ,
 „ putavimus . Nunc superest , ut
 „ Populo nobis commisso in me-
 „ moriam adducamus Pœniten-
 „ tiæ Sacramento crimina qui-
 „ dem , pœnasque æternas con-
 „ donari , sed luendas adhuc tem-
 „ porarias plerumque superesse :
 „ Quare cum *perpauci suis cri-*
 „ *minibus satisfacere piis operi-*
 „ *bus contendant* , Clementissi-
 „ mus Redemptor noster ob sin-
 „ gularem in nos charitatem ,
 „ hominum calamitati prospexit ,
 „ & opulentissimum in Ecclesia
 „ thesaurum suorum meritorum
 „ reliquit , quæ per mortem ,
 „ cruciatusque suos congeffit ;
 „ præclara etiam merita B. M.
 „ Virginis , Sanctorum Aposto-
 „ lo-

„ lorum, Martyrum, aliorum-
 „ que Cælitum Ecclesiæ largitus
 „ est, quibus divitiis spirituali-
 „ bus distribuendis Apostolorum
 „ Principem S. Petrum, Roma-
 „ nosque Pontifices in ejus lo-
 „ cum sufficiendos præposuit. Il-
 „ los enim sui Vicarios in terris
 „ constituit, & Claves Regni
 „ Cælorum, plenamque ligandi,
 „ atque solvendi potestatem eis-
 „ dem concessit.

„ Id Clemens VI. his verbis
 „ apertè declaravit: *Quem qui-*
 „ *dem thesaurum, non in suda-*
 „ *rio repositum, non in agro ab-*
 „ *sconditum* (de merito Passio-
 „ nis Christi infinito res agitur)
 „ *sed per Beatum Petrum Cæli-*
 „ *clavigerum, ejusque successo-*
 „ *res suos in terris Vicarios com-*
 „ *misit Fidelibus salubriter di-*
 „ *spensandum &c. ad cujus qui-*
 „ *dem thesauri cumulum Beata*

„ *Genetricis, & omnium Electo-*
 „ *rum a primo Iusto, usque ad*
 „ *ultimum merita adminiculum*
 „ *præstare noscuntur.* Insuper
 „ S. Thomas, & S. Bonaventura
 „ sapientia, ac sanctitate clarif-
 „ simi, licet in variis opinionibus
 „ dissimiles, eandem rem
 „ confirmarunt, centum annis
 „ prius quam Clemens VI. suam
 „ decretalem conficeret, quod
 „ Card. Pallavicinus, & Doctor
 „ Estius sapienter advertunt.

„ Hac divina facultate præditi
 „ Pontifices hunc thesaurum sæ-
 „ pius recludunt, & legitimis ad-
 „ ducti causis, variis temporibus
 „ nunc limitatam, nunc plenissi-
 „ mam pœnarum omnium remis-
 „ sionem impertiunt, quas in hac
 „ vita, vel in Purgatorio ob sce-
 „ lera nostra luere debemus. Olim
 „ non adeò liberales Pontifices
 „ extiterunt, uti S. Thomas testa-

„ tur, qui tradit Indulgentiam
 „ quinque annorum tribui illis
 „ consuevisse, qui trans mare
 „ positi ad invisenda SS. Petri, &
 „ Pauli templa se conferebant,
 „ trium annorum Indulgentiam
 „ illis, qui ob eandem causam
 „ ultrà montes degentes ad Ur-
 „ bem profecti essent; unius ve-
 „ rò anni Indulgentiam iis, qui
 „ ex vicinioribus Provinciis hoc
 „ iter susciperent. Cum tamen
 „ hoc tempore ob gravissimas ra-
 „ tiones poenæ à *Canonibus præ-*
 „ *scriptæ rursus induci nequeant*
 „ majori liberalitate Pontifices
 „ utantur, ut Fideles impensius
 „ ad Deum confugiant, cum ne-
 „ cessitas postulat, ut cultus Deo
 „ præstetur, & animarum saluti
 „ felicius provideatur: Respon-
 „ demus (ait Bellarminus) *the-*
 „ *saurum meritorum Christi, &*
 „ *Sanctorum esse veram causam,*

„ cur Indulgentiæ concedi possint,
 „ sed præter istam causam re-
 „ quiri aliam, quæ moveat ad
 „ dispensandum thesaurum hoc
 „ tempore potius, quam alio, &
 „ nunc magis, nunc minus libe-
 „ raliter: Non enim debent Pon-
 „ tifices relaxare pœnitentialem
 „ satisfactionem, neque recur-
 „ rere ad thesaurum, nisi quan-
 „ do judicant id esse necessarium,
 „ & utile ad gloriam Dei, &
 „ Animarum salutem.

„ Hujus liberalitatis causas ex-
 „ pendere prætermittimus, at-
 „ que utrum æqualitas quædam
 „ inter opus injunctum & Indul-
 „ gentiam intercedat: observan-
 „ dum est (prosequitur Bellar-
 „ minus) justam quidem causam
 „ semper requiri, sed non est
 „ subditorum judicare, utrum
 „ causa sit justa, vel injusta, de-
 „ bent enim simpliciter existima-

„ re

„ *re justam esse* . Ad nos perti-
 „ net summas Deo gratias exol-
 „ vere , qui his temporibus ver-
 „ samur , quibus hic cælestis the-
 „ saurus frequenter , ac libera-
 „ lissimè patet . Ad nos etiam
 „ spectat omnem curam impen-
 „ dere , ut his spiritualibus di-
 „ vitiis cumulemur , ea *diligen-*
 „ *tet fructuoseque opera perficien-*
 „ *tes , quæ decernuntur ,* * quæ si
 „ negligenter suscepta fuerint ,
 „ thesaurum Indulgentiæ ne-
 „ quidquam expetitur . S. Pon-
 „ tifex Gregorius VII. Remigio
 a 4 „ Epi-

* „ N. B. Vult hæc Institutio opera
 „ injuncta non fieri negligenter , scilicet ,
 „ vel cum non cura rectitudinis talium
 „ operum , vel cum neglectu aliorum si-
 „ milium operum , sequitur enim ipsa
 „ Bellarmini , aliorumque opinionem
 „ exigentium opera injuncta ad placa-
 „ tionem , vel satisfactionem oportere
 „ esse non vitiata a circumstantiis , ut con-
 „ ferant ad fructum Indulgentiæ perci-
 „ piendum .

„ Episcopo Indulgentiam largi-
 „ tus fuit : *Absolutionem pecca-*
 „ *torum tuorum , sicut rogasti*
 „ *auctoritate Principis Apostolo-*
 „ *rum fulti , tibi mittere dignum*
 „ *duximus , si tamen bonis operi-*
 „ *bus inhærendo , commissos ex-*
 „ *cessus plangendo quantum va-*
 „ *lueris , corporis tui habitacu-*
 „ *lum , Deo mundum Templum*
 „ *exhibueris .* Cardinalis autem
 „ Baronius postquam eam senten-
 „ tiam exposuit *ut appareat , in-*
 „ *quit , Sedis Apostolicæ Indul-*
 „ *gentias illis communicari , qui*
 „ *quantum suppetunt vires , bene*
 „ *operari non prætermittunt , non*
 „ *autem ignavis otiosis , ac tepe-*
 „ *scentibus .* Cardinalis Cajeta-
 „ nus ad obtinendam Indulgen-
 „ tiam censuit non modo præ-
 „ scriptis operibus satisfaciend-
 „ dum , sed etiam necessario de-
 „ liberandum , salutarî Poeni-
 „ ten-

„ tentia criminum labes peculia-
 „ riter expiare , id qui facere
 „ contemnat cum possit , nullum
 „ ex Indulgentia fructum perci-
 „ pere , Cardinalem Cajetanum,
 „ Navarrus quoque sequitur , li-
 „ cet alii plures , & *nos quoque,*
 „ *quibus opinionum novitas dis-*
 „ *plicet,* illam pariter omittamus,
 „ nullum quippè diploma Ponti-
 „ ficiū pro concedendis Indul-
 „ gentiis unquam vidimus , in
 „ quo ea singularis conditio præ-
 „ feratur . Singulis tamen Cardi-
 „ nalis Bellarmini doctrinam pro-
 „ ponendam ducimus . *Accipiunt*
 „ *prudentes Christiani Indulgen-*
 „ *tias , ut simul etiam studeant*
 „ *dignos Pœnitentiæ fructus face-*
 „ *re.* Illam Cardinalis Pallavicini-
 „ nus , cum de usu Indulgentia-
 „ rum sermonem habet , his ver-
 „ bis explicat : *Neque sanè Fi-*
 „ *deles Indulgentiarum causa ne-*

„ gli-

„ gligentes fiunt , ut pro expur-
 „ gandis criminibus, alia pietatis
 „ opera Deo minimè persolvant .
 „ Cum enim ancipites sint utrum
 „ reipsa Indulgentiam sibi merue-
 „ rint , stimulo quodam incitan-
 „ tur , ut pro cælesti hoc Thesau-
 „ ro TUTIUS comparando varias
 „ salutaris pœnitentiæ rationes
 „ aggrediantur ; ex alia parte
 „ injuncta pietatis opera si fiant,
 „ studium Religionis adaugent &
 „ quamdam facilitatem indu-
 „ cunt , ut illis similia suscipian-
 „ tur , quod ferme quotidiana
 „ experientia comprobatur , Ha-
 „ ctenus Institutio Benedicti XIV.
 Placet huic annexere id quod
 Cardinalis Bellarminus docet cir-
 ca causam omninò requisitam ad
 valorem Indulgentiæ suo lib. 1.
 de Indulg. cap. 12. ibi „ obser-
 „ vandum est quarto supra di-
 „ ctum esse plerumque in causa
 „ ju-

„ iusta duo contineri, *Finem*, &
 „ *media ad finem*, quoniam ali-
 „ quando solus finis satis esse vi-
 „ detur sine ullis mediis, id est si-
 „ ne aliquo opere injuncto, quan-
 „ do videlicet Finis non pendet
 „ ab aliquo opere & per se suffi-
 „ cit ad indulgentiam justam,
 „ perficiendam. Sic olim ad pe-
 „ titionem Martyrum, ut supra
 „ ex Tertulliano, & Cypriano
 „ probavimus, dabantur Indul-
 „ gentiæ sine aliquo opere in-
 „ juncto, quia judicabat Eccle-
 „ sia satis magnam causam esse
 „ petitionem Martyrum, ut vi-
 „ delicet homines ad martyrium
 „ accenderentur, cum viderent
 „ tanti fieri Martyrum preces.
 „ Vocantur autem in his locis
 „ Martyres, qui in carceribus
 „ inclusi, & jam aliquid passi
 „ fuerant ob confessionem Fi-
 „ dei, & consumationem Mar-
 „ ty-

„ tyrii expectabant ; Quomodo
 „ etiam in articulo mortis ho-
 „ minibus benemeritis de Eccle-
 „ sia dantur aliquando Indul-
 „ gentiæ , neque opus ullum in-
 „ jungitur , quia videtur causa
 „ esse satis iusta ipsa necessitas
 „ extrema conjuncta cum præce-
 „ dentibus meritis . Ita legitur
 „ Gregorius VII. Indulgentias
 „ sine ullo injuncto opere dedis-
 „ se Lib. 1. Epist. 34. , Lib. 2.
 „ Epist. 61. & Lib. 6. Epist. 15.
 „ Itaque sine opere injuncto con-
 „ cedi potest aliquando Indul-
 „ gentia , sine causa vero eaque
 „ iusta , & rationabili nunquam
 „ potest „ hæc Bellarminus , qui
 „ relata sententia Card. Cajetani
 „ cap. immediatè sequenti subdit se
 „ nullum legisse Authorem , qui Ca-
 „ jetanum sequatur præter Bartho-
 „ lomeum Eusebium &c. ; nec mirum
 „ cum teste Suarez novam esse suam
 „ opi-

opinionem Cajetanus ipse testetur.

Ex his intelligenti pronum est colligere primò non requiri in subiecto per se, & ex necessitate sollicitudinem, ac propositum satisfaciendi Deo in hac vita satisfactione punitiva ad effectum lucrandi quascunque Indulgentias, ut volebat Cajetanus, nec requiri ad lucrandam plenariam Indulgentiam sollicitudinem, ac propositum, non quodcunque, *sed serium, & efficax* satisfaciendi, ita ut de facto & in actu secundo ea satisfactio præstetur a suscepturo Indulgentiam, quæ spectata uniuscujusque conditione, ac debilitate non est moraliter impossibilis, nec nimis ardua, ut volebat Eusebius Amort, & magis arctè videtur nunc velle nescio quis scriptor. De utraque enim opinione procedunt, quæ dicebat Benedictus XIV., in
fe-

secunda edit. latin. suarum Instit. : *Opinionum novitas displicet, & nullum Diploma Pontificium pro concedendis Indulgentiis unquam vidimus, in quo ea singularis conditio præferatur.*

Colliges secundo solidam & famam, non novam, sed veterem esse Dissertationis hujusce doctrinam, quæ tradit supposita auctoritate, & causa justa in concedente, & statu gratiæ in subiecto nil aliud *per se* requiri ad Lucrandas Indulgentias, & solum per accidens ex voluntate concedentis requiri Executionem operum, quæ ille per modum conditionis hic & nunc exegerit. Id quod etiam ex Benedicti XIV. Institutione satis constat, qui docens Gregem sibi commissum, pro lucranda Indulgentia, hoc unum monet supposito statu gratiæ, ut diligenter & fructuose per-

perficiat opera, quæ decernuntur.
Id ipsum fulius docuerat Suarez
disp. 52. sect. 4. de Indulgentiis.

Colliges 3. non esse de necessitate absoluta Indulgentiæ, ut exigatur aliquod pium opus ad effectum ejus obtinendum, nec esse de necessitate causæ proportionatæ, ut semper compleatur per opus injunctum. Ut cum D. Thoma, & Ven. Bellarmino sentiunt unanimiter Doctores.

Quod si quis voluerit refutationem eorum, quæ recentissimus Libellus hoc anno 1760. editus affert adversus hanc dissertationem, adeat si lubet tom. 1. de Indulg. Rm̃i P. Fr. Theodori a Spiritu Sancto, adhuc Deo dante in Urbe superstitis & in materia præsertim Indulgentiarum peritissimi, ibique cap. 8. art. 3. inveniet abunde disjectam ejus libelli opinionem, cum suis fundamentis.

mentis, ita ut quidquam ulterius reponere sit prorsus *actum agere*. Profectò tempus tererem (quod cum res postulaverit non recuso) si cum iis congregarer, qui de rebus, quæ apud probatissimos, tum veteres, tum recentes Theologos extra controversiam sunt, controversiam faciunt, & si quid castigatè dixeris, id alio sub aspectu, detortàque sententia Populo traducendum obtrudunt.

Cæterum noverit Lector, non præcisè Cajetani, sed aliam opinionem magis singularem esse, quam præsens dissertatio summo-
pere improbat, utpote quæ requirit pro Capacitate in subjecto impotentiam, *adæquatè* satisfaciendi, & ut docet Suarez disput. 52. sect. 9. n. 1. *longè improbabilior est, quàm opinio Cajetani, quia ferè omninò enervat, & tollit facultatem concedendi Indulgentias.*

-1831

F I N I S









5-3-3-

